

主旨:

Give Views

Comments:

我係一位土生土長嘅香港人，有一樣嘢由第一個諮詢會開始，我就好想回應。我好認同司長你，就係家庭團聚好重要。我屋企至太爺，甚至再更早一代，我哋就已經喺香港居住，今時今日，我最親最親嘅就係香港嘅年長父母、兄弟，同埋剛出世同就出世嘅姪仔姪女。我哋喺中國已經無任何親戚朋友。

所以，我都好重視一家團聚，我希望父母可以安安定定喺香港安老，我姪仔姪女下一代，可以喺香港升學就業，咁點解份文件一味要我哋接受中國人落嚟定居，但係我哋就要考慮北上安老，下一代要考慮中國升學就業，要我屋企考慮將來各散東西嘅？咁係乜嘢團聚呀？點解咁雙重標準嘅？

你哋一路話我哋爭取審批權，限制人落嚟香港團聚係歧視，我就話俾你聽，我前幾年做義工探過好多新移民家庭，好多就係因為「家庭團聚」呢四個字，無機會衡量過自己能否適應香港生活就落咗嚟，結果造成好多人經濟負荷唔到要住劏房，有專業人士因為學歷唔認可，要做一啲好低薪嘅勞力工作，甚至因為適應問題，夫婦起衝突落到嚟無耐離婚，變咗單親家庭，影響小朋友成長。因此設立審批，讓佢哋考慮適合喺香港定中國團聚，至係一個真正為佢哋負責任、為佢哋著想嘅做法。

更何況近來越來越多事，反映無審批權，唔知嚟嘅人係乜嘢背景，真係會對香港造成重大壓力。終審法院上月 17 日，裁定政府規定居港滿 7 年方可申請綜援的政策違憲後，有傳媒報導，一個月內已多咗二千宗新移民申請綜援個案，估計潛在個案甚至有 2 萬多宗。而你哋財政司長曾俊華，為咗呢個無法預計嘅數目，講過政府有一天可能會轉盈為虧，再多的儲備也有耗盡的一日，你唔信我哋，都信下財政司司長你同事好嘅？

希望政府拿出勇氣，為維護港人生存空間、拿出決心爭取審批權，以及限制流動人口數目，因為大陸自由行香港，因為為著唔夠 5% 嘅 GDP，香港嘅生態環境已經大受影響，市民亦積存唔少不滿，令市民越嚟越多行動反映佢哋嘅苦況。希望你唔為港人著想，亦都為你哋咁同事著想下，等佢哋唔駛做得咁辛苦㗎。